

**Inatsisartunut aalajangiiffigisassatut siunnersuut Naalakkersuisut peqquneqassasut siunnersuuteqaqqullugit eqqussukkanut akitsuutit pillugit inatsisartut inatsisaat nr. 19**

**30. oktober 1992-imeersup allangortinneqarnissaanik, taamaasillutik kaffinnut akitsuutit eqqartorneqartoq § 1, nr. 11 atorunnaarsillugu**

*Inatsisartunut ilaasortamit Jens-Frederik Nielsenimit, Demokraatit, saqqummiunneqartoq aamma*

**Inatsisartunut isummerfigisassatut siunnersuut Naalakkersuisut peqquneqassasut siunnersuuteqaqqullugit eqqussukkanut akitsuutit pillugit inatsisartut inatsisaat nr. 19**

**30. oktober 1992-imeersup allangortinneqarnissaanik, taamaasillutik tiinut akitsuut eqqartorneqartoq § 1, nr. 11 atorunnaarsillugu**

*Inatsisartunut ilaasortamit Jens-Frederik Nielsenimit, Demokraatit, saqqummiunneqartoq aamma*

**Inatsisartunut aalajangiiffigisassatut siunnersuut Naalakkersuisut peqquneqassasut siunnersuuteqaqqullugit eqqussukkanut akitsuutit pillugit inatsisartut inatsisaat nr. 19**

**30. oktober 1992-imeersup allangortinneqarnissaanik, taamaasillutik neqinut akitsuutit eqqartorneqartoq § 1, nr. 13-17 atorunnaarsillugu**

*Inatsisartunut ilaasortamit Jens-Frederik Nielsenimit, Demokraatit, saqqummiunneqartoq aamma*

**Inatsisartunut aalajangiiffigisassatut siunnersuut Naalakkersuisut peqquneqassasut siunnersuuteqaqqullugit eqqussukkanut akitsuutit pillugit inatsisartut inatsisaata allangortinneqarnissaanik, taamaasillutik sukkunut, lakridsinut sukkulaatinut il.il. akitsuutit atuutilersinneqartup § 1, nr. 1-2, Inatsisartut inatsisaanni nr. 23 18. november 2019, atorunnaarsinneqassasut**

*Inatsisartunut ilaasortamit Jens-Frederik Nielsenimit, Demokraatit, saqqummiunneqartoq*

**pillugit**

**Aningaasaqarnermut Akileraartarnermullu Ataatsimiititaliap**

**siunnersuutip aappassaaneerreqarneranut**

**ISUMALIUTISSIISSUTAA**

Ataatsimiititaliap suliarinninnermini ilaasortarai:

Inatsisartunut ilaasortaq Jens Napaattooq, Naleraq, siulittaasoq  
Inatsisartunut ilaasortaq Erik Jensen, Siumut, siulittaasup tullia  
Inatsisartunut ilaasortaq Agathe Fontain, Inuit Ataqatigiit

Inatsisartunut ilaasortaq Vivian Motzfeldt, Siumut  
Inatsisartunut ilaasortaq Hans Aronsen, Inuit Ataqatigiit  
Inatsisartunut ilaasortaq Jens-Frederik Nielsen, Demokraatit  
Inatsisartunut ilaasortaq Aqqalu Jerimiassen, Atassut

UKA2021-mi ulloq 14. oktober 2021-mi siullermeerinninnerup kingorna ataatsimiititaliap siunnersuutit misissorpai.

### **1. Siunnersuutit imarisaat siunertaallu**

Aalajangiiffigisassatut siunnersuutit sisamat pineqartut aqqutigalugit inuussutissanik assigiinngitsunik eqqussuinermi akitsuutit siunnersuuteqartup peerniarpai apparniarlugilluunniit. Kaffinik<sup>1</sup>, tiinik<sup>2</sup> neqinillu<sup>3</sup> eqqussuinermi akitsuutit peerneqarnissaat pillugu siunnersuummik saqqummiussinissamat Naalakkersuisut peqquneqarnissaat siunnersuutigineqarpoq. Tamatuma saniatigut sukkunut, lakridsinut, sukkulaanut il.il. akitsuutit 2019-imi qaffanneqarnertik sioqqullugu annertussutsimut appartinneqarnissaat pillugu siunnersuummik saqqummiusseqqullugit Naalakkersuisut peqquneqarnissaat siunnersuutigineqarpoq<sup>4</sup>.

### **2. Siunnersuutit Inatsisartunit siullermeerneqarnerat**

Siunnersuutit Inatsisartut siullermeerinninneranni assigiinngitsumik isummerfigineqarput. Naalakkersuisut allannguutissatut siunnersuummik saqqummiussippat, taannattaaq assigiinngitsumik isummerfigineqarpoq. Taamaalillunilu oqallinnerup ilaa aalajangiiffigisassatut siunnersuutit maannatut iluseqarlutik akuerineqarnissaannut imaluunniit Naalakkersuisut allannguutissatut siunnersuutaat naapertorlugu Naalakkersuisut akileraartarnikkut aaqqissuusseqqinnissaannut ilanngunneqarnissaannut tunngavoq. Tamatuma saniatigut oqallinneq assigiinngitsorpasuarput sammiveqarpoq. Qulequttat isumaliutissiissummut matumunnga pingaarutillit uku taaneqarsinnaapput:

- Aalajangiiffigisassatut siunnersuutit aningaasalersornissaannut siunnersuutit
- Akitsuutit pissusilersuutinik allannguisinnaanerit
- Innuttaasut aningaasatigut iluanaaruteqarsinnaanerit
- Tunisassiassanik tunisassiorneq aammalu nioqqutissanik eqqussuinermi akitsuutit pingaaruteqassiat
- Akileraartarnermik aaqqissuusseqqinnissaq

---

<sup>1</sup> EM2021/67

<sup>2</sup> EM2021/68

<sup>3</sup> EM2021/69

<sup>4</sup> EM2021/70

Qulequttat matuma siuliani allassimasut Naalakkersuisullu allannguutissatut siunnersuutaat matuma kinguliani sammineqarput.

### **3. Naalakkersuisut allannguutissatut siunnersuutaat:**

Naalakkersuisut siunnersuummik siullermeerinninnermi allannguutissatut siunnersuummik saqqummiussipput:

*”Naalakkersuisut akileraartarnermut akitsuusiisarnermullu aaqqissuusseqqinnissamik pilersaarutigineqartumut ataqatigiissillugu, nioqqutissat eqqussorneqartut akitsuutaasa allanngortinnissaannut periarfissamik misissuinissamik peqquneqarnissaat pillugu inatsisartuni aalajangiiffigisassatut siunnersuut.”*

Naalakkersuisut allannguutissatut siunnersuutaat siunnersuutaappaartumi pineqartumut tunngasuunissamik piomasaaqammut eqqortitsinngitsoq ataatsimiititaliamit oqaatigineqassaaq. Tamatumunnga pissutaavoq allannguutissatut siunnersuutip akitsuutitut ataatsimut isiginninnerulluni oqaasertalersorneqarsimanera aammalu nioqqutissanut siunnersuutini taaneqartunit amerlanerusunut tunnganera. Taamaalillunilu allannguutissatut siunnersuutikkut aalajangiiffigisassatut siunnersuut tigussaasumik isummerfigineqanngilaq, tassuunakkulli ”nioqqutissat eqqussorneqartut akitsuutaasa allanngortinnissaannut periarfissamik misissuinissamik” Naalakkersuisut peqquneqarlutik. Naalakkersuisut allannguutissatut siunnersuut namminneq siunnersuutigigamikku akuerineqassappat piviusunngortissagaat ataatsimiititaliamit naatsorsuutigineqarpoq. Tamatuma saniatigut Naalakkersuisut allannguutissatut siunnersuummik ataasiinnarmik saqqummiussisut ataatsimiititaliamit maluginiarneqarpoq. Tamanna aalajangiiffigisassatut siunnersuutitut sisamaasunut tamanut atuuttutut ataatsimiititaliamit paasineqarpoq.

### **4. Ataatsimiititaliap siunnersuutininik suliarinninnera**

Aalajangiiffigisassatut siunnersuutitut sisamat matumani pineqartut siullermeerneqarneranni qulequttat oqallisigineqartut matuma kinguliani ataatsimiititaliamit sammineqarput.

#### **4.1. UKA2021/68-imi kukkuneq (kalaallisoortaani)**

UKA2021/68-ip kalaallisuuata taasissutissartaani nioqqutissanik eqqussuineq pillugu Inatsisartut inatsisaanni aalajangersagaq kukkusoq innersuunneqartoq ataatsimiititaliamit paasineqarpoq. Taasissutissamili taamatullu siunnersuummut tunngavilersuummi ersarissumik allassimavoq tiinik eqqussuinermi akitsuutip atorunnaarsinneqarnissaa pineqartoq. Taamaattumillu siunnersuut nioqqutissanik eqqussuinermi Inatsisartut inatsisaanni § 1, nr. 12-imut (§ 1, nr. 11 pinnagu) tunngasutut isigalugu siunnersuut ataatsimiititaliamit suliarineqarpoq.

#### ***4.2. Aalajangiiffigisassatut siunnersuutit aningaasalersornissaannut siunnersuutit***

Siunnersuutimi aningaasalersorneqarnissaannut siunnersuuteqartoq siunnersuuteqaraangat pitsaasuusooq Aningaasaqarnermut Ataatsimiititaliap aallarniutigalugu oqaatigissavaa. Tamatumali peqatigisaanik aningaasalersuinissamut siunnersuut malissallugu Naalakkersuisut pisussaaffiginnimmassuk ataatsimiititaliamit oqaatigineqassaaq, tassa taanna taasissutissamut ilanngimmat. Taamaalillunilu siunnersuutitut aningaasalersuutissatut siunnersuutiminut siunnersuuteqartup allaganngorlugu tunngavilersuutaa apeqqutaatinnagu siunnersuutit akuerineqarsinnaapput. Taamaattumillu siunnersuutitut aningaasalersuutissat aningaasanut inatsissatut siunnersuut pillugu isumaqatigiinniarnernut ilaatinneqartariaqarput, taamaalillunilu Naalakkersuisut partiillu aningaasanut inatsit pillugu isumaqatigiissuteqartut akornanni isumaqatigiissutigineqartariaqarlutik.

#### ***4.3. Akitsuutit pissusilersuutinik allannguisinnaanerit***


Siullermeerinninnermi qulequttat oqallisigineqarnerit ilagaat akitsuutit inuiaqatigiinni pissusilersornermut sunniutaat, aamma aningaasaqarnikkut pissusilersornermik taaneqartarpoq. Tassalu assersuutigalugu nioqqutissiat akitsuusernerisigut innuttaasut taakkuninnga pisinikinnerulersinneqarsinnaanerit. Nioqqutissiap akitsuuserneratigut taassuminnga pisinissamut innuttaasut kiffaangissuseqarlutik periarfissaqarput, akitsuutilli aamma kingunerisinnaallugu nioqqutissiamik innuttaasut pisinnginnerat, tassa akisunerulernera pissutigalugu. Sukkunut akitsuut, siusinnerusukkut annertussutsimut utertikkumaneqartoq<sup>5</sup>, pillugu Brugsenimit Pilersuisumillu 2020-mi saqqummiunneqarpoq akitsuutit akuerineqarnerisa kingorna atuneq appariaateqarsimanngitsoq<sup>6</sup>. Takussutissiaq matuma kingulianiittoq malillugu sukkunik akulinnik eqqussuisarneq 2019-imi akitsuutinik qaffaanerup kingorna allannguuteqangaarsimanngitsoq:

---

<sup>5</sup> UKA2021/70

<sup>6</sup> <https://knr.gl/da/nyheder/afgifter-p%C3%A5-usunde-varer-skr%C3%A6mmer-ikke-forbrugere>

Nunatsinnut avammullu tunisat sukumiinerusumik kingorna piffissaq. Nunatsinnut tunisat, Ukioq tamaat, Kiilu, 17 Sukker og sukkerverer.



Takussutissaq 1: 2016-imit 2020-imut sukkunik sukkunillu nioqqutissianik eqqussuineq.

Takussutissiami siuliani allassimasumi takuneqarsinnaasutut piffissami 2016-imit 2020-mut sukkunik sukkunillu nioqqutissianik eqqussuineq aalaakkaasimavoq, taamaattorli 2019-imit 2020-mut annikitsumik apparialaarsimalluni, tamatumani sukkut sukkunillu nioqqutissiat 100 tonsit missaannik ikinnerit tikisinneqarsimallutik.

#### ***4.4. Tunisassiassanik tunisassiorneq aammalu nioqqutissanik eqqussuinermit akitsuutit pingaaruteqassusiat***

Neqinit tunisassiat eqqussuinermit akitsuutaasa peerneqarnissaannik siunnersuuteqartup siunnersuutaa neqinit tunisassianut akitsuusigaasunut<sup>7</sup> tamanut, tassungalu ilanngullugu tunisassiassatut tunisassiarineqartunut, atuutissaq.

Tassunga atatillugu oqaatigineqassaaq nioqqutissanik akitsuusiinermit pineqanngimmat pissusilersornermik allanngortitsinissaq, akerlianilli pineqarluni nunatta karsiata iluanaaruteqarnissaa. Matumani tiinut kaffinullu eqqussuinermit akitsuutit pillugit aalajangiiffigisassatut siunnersuutit immikkut taaneqassapput<sup>8</sup>, tassa taakku pissusilersornermik allannguinissamik imaluunniit nunatsinni tunisassiornermik illersuinissamik nalinginnaasumik siunertaqarneq ajormata.

Pissusilersornermik allannguinissaq siunnersuutit siullermeerneqarneranni Naalakkersuisunit taasaqarfigineqanngimmat, akerlianilli iluanaarutissaagaluanik annaasaqarnissaaq kisimi ernummatigineqarmat ataatsimiititaliamit maluginiarneqarpoq.

Tassunga atatillugu nersussuit puulukillu nujuitsut timaat iluitsut affallu akitsuusigaasunut

<sup>7</sup> UKA2021/69

<sup>8</sup> UKA2021/67 UKA2021/68

ilaatinneqanngimmata ataatsimiititaliamit oqaatigineqassaaq. Neqinik<sup>9</sup> tunisassiassatut nunatsinni tunisassiornerup (agguilluni) illersorneqarnissaa siunertaralugu akitsuusiinnginneq taanna 1999-imi atuutilersinneqarpoq. Taamatut akitsuuteqartitsinnginnerup<sup>10</sup> nalilersorneqarnissaanik Naalakkersuisut peqquneqarnissaat pillugu maanna katersuunnermi aalajangiiffigisassatut siunnersuuteqartoqarmat ataatsimiititaliamit maluginiarneqarpoq. Akitsuuteqartitsinnginnerup sunniutai nalilersorumallugit tamanna assut soqutiginaateqartutut ataatsimiititaliamit isumaqarfigineqarpoq.

Kiisalu neqinik eqqussuinnermi akitsuutit atorunnaarsinneqarnissaanik siunnersuutikkut savanik tunisassiat akitsuutaat peerneqassammata ataatsimiititaliamit oqaatigineqassaaq. Tamanna nunatsinni savanik tunisassiornermut sunniuteqarsinnaavoq aammalu savanik tunisassianut assersuutigalugu Islandimeersunut New Zealandimeersunulluunniit unammillerneq ajornerulersinneqarsinnaalluni.

#### ***4.5. Innuttaasut aningaasatigut iluanaaruteqarsinnaanerat***

Nioqqutissanik siunnersuutit aqutigalugit eqqussuinnermi akitsuusigaajunnaartussanik innuttaasut pisinerminni aningaasanik sipaaruteqassasut siunnersuuteqartoq allappoq. Tamatumani ataatsimiititaliamit erseqqissaatigineqassaaq tamanna periarfissat arlallit ilagimmassuk, tassami maanna akiusut aammalu akitsuutinik appaanerup kingorna akiusut akornanni nikingassutip tigummiinnarnissaa pisiniarfiit toqqarsinnaammassuk. Akinik misissuinissap<sup>11</sup> UKA2020-mi agguanneqartussap aallartinneqarnissaanik Naalakkersuisut 2019-imi Inatsisartunit peqquneqarmata ataatsimiititaliamit oqaatigineqassaaq. Taanna sulitamanut saqqummiunneqanngilaq isumaliutissiissummullu matumunnga tapertaasimasinnaagaluarluni.

#### ***4.6. Akileraartarnermik aaqqissuusseqqinnissaq***

Immikkoortoq pingaarutilik kingulleq aalajangiiffigisassatut siunnersuutinik ukuninnga siullermeerinninnermi erseqqissaatigineqartoq tassaavoq nunatsinni akileraartarnikkut akitsuusiisarnikkullu nalinginnaasumik aaqqissuusseqqinnissaq.

Aalajangiiffigisassatut siunnersuutit matumani pineqartut akuerineqarnerat itigartinneqarnissaalluunniit apeqqutaatinnagu akileraartarnikkut akitsuusiisarnikkullu aaqqissuusseqqinnissaq Naalakkersuisut akileraartarnikkut aaqqissuusseqqinnissaa sukumiisumik isumaliutigineqarnissaa Aningaasaqarnermut Ataatsimiititaliamit pingaartinneqarpoq. Akileraartarnermut Atugarissaarnermullu Isumalioqatigiissitaq naapertorlugu nioqqutissanik eqqussuinnermi akitsuutit 2008-mi nunatta karsiata isertitaasa 17 %-ingajarisimavaat. Kisitsit taanna 2 %-inik appariarpoq, taamaalillunilu nioqqutissanik

---

<sup>9</sup> UKA1998/22

<sup>10</sup> UKA2021/109

<sup>11</sup> FM2019/194

eqqussuinermi akitsuutit nunatta karsiata isertitaasa 15 %-ingajarisimallugit. Nioqutissanik eqqussuinermi akitsuutit nunatta karsiata isertitaasa pingaarutillit ilagigaat aammalu akitsuutit nunatsinni innuttaasunut assut pingaaruteqarmata Aningaasaqarnermut Ataatsimiititaliamit oqaatigineqassaaq. Kiisalu Akileraartarnermut Atugarissaarnermullu Isumalioqatigiissitap kaammattuutai Naalackersuisut sulinerminni ilannguppatigit naleqquttuusooq siullermeerinninnermi oqaatigineqarpoq. Tamanna ataatsimiititaliamit aamma pingaartinneqarpoq.

#### **4.7. Allanguutissatut siunnersuut ataatsimiititaliami amerlanerussuteqartunit saqqummiunneqartoq**

Naalackersuisut allanguutissatut siunnersuutaat aallaavigalugu naaperiaanissaq ataatsimiititaliap suliarinninnermini kissaatigisimavaa. Ataatsimiititaliami amerlanerussuteqartut Inuit Ataqtigiinneersut, Siumumeersut Atassummeersullu Naalackersuisut aammalu Naalackersuisut allanguutissatut siunnersuutaat tunngaviatigit isumaqatigaat. Ataatsimiititaliamili amerlanerussuteqartut taakku kissaatigaat akileraartarnikkut aaqqissuusseqqinnissamut tunngatillugu killigitassap erseqqinnerulaarnissaa, taamaattumillu ima allanguutissatut siunnersuuteqarlutik:

*”Nioqutissanik eqqussuinermi akitsuutit aalajangiiffigisassatut siunnersuutini taaneqartut, akileraartarnikkut akitsuusiisarnikkullu aaqqissuusseqqinnissamut pilersaarutaasumut ataqtigiissillugit Inatsisartunilu partiit tamarmiusut akuutillugit, qinigaaffimmi matumani allanngortinneqarsinnaanerannut periarfissat misissoqqullugit Naalackersuisut peqquneqarnissaannik Inatsisartut aalajangiiffigisassaattut siunnersuut.”*

Taamaalillunilu aamma nioqutissat aalajangiiffigisassatut siunnersuutini taaneqartut misissuinermi pineqarnissaat aalajangiiffigisassatut siunnersuutikkut siuliani allassimasukkut erseqqissaatigineqarpoq.

#### **5. Siunnersuutip aningaasaqarnikkut kingunerisassai**

Aalajangiiffigisassatut siunnersuutip piviusunngortinneqarnerata aningaasaqarnikkut allaffissornikkullu kingunerisassai siunnersuummut tunngavilersuummi allaaserineqassasut Inatsisartut suleriaasianni § 33, imm. 1-imi allassimavoq.

Tamanna naapertorlugu siunnersuutip piviusunngortinnerani aningaasatigit kingunerisassat siunnersuummi nalunaarneqartut ataatsimiititaliamit maluginiarneqarpoq. Taamaalillunilu siunnersuuteqartoq § 37 naapertorlugu apeqquteqarsimavoq, tamatumanilu siunnersuutit aningaasatigit kingunerisassaat Naalackersuisunit nassuiaatigineqarsimallutik. Tassunga atatillugu § 37 naapertorlugu apeqqut nummer 38 ataatsimiititaliamit innersuunneqassaaq. Tamanna ataatsimiititaliamit iluarisimaarneqarpoq.

## 6. Ataatsimiititaliap inassuteqaatai

**Ataatsimiititaliami amerlanerussuteqartut** Inuit Ataqtigiit, Naleqqap, Siumup Atassutillu ilaasortaataasa **ataatsimiititaliami amerlanerussuteqartut taaneqartut allannguutissatut siunnersuutaat akuerineqassasoq** inassutigaa, **taamaalillutillu Naalackersuisut allannguutissatut siunnersuutaat aammalu aalajangiiffigisassatut siunnersuutaqaartut sisamat itigartillugit.**

**Ataatsimiititaliami ikinnerussuteqartup** Demokraatit ilaasortaataata ima tunngavilersuuteqarluni **siunnersuutaqaartut akuerineqassasut** inassutigaa:

*”Demokraatini isumaqarpugut Kalaallit Nunaanni inuuniarneq suliffeqarfiuteqarnerlu akikinnerusariaqartoq. Tamanna pimoorulluinnarlugu qulequtsiupparput qineqqusaarutitsinni taamaattumillu maanna inatsisartunut aaliangiiffigisassatut siunnersuutitit qaqillugit. Demokraatini isumaqarpugut partiitit tutsuiginassuseqarniaraanni sulissutigineqartuartariaqartoq qineqqusaarnermi neriorsuutiginiuusat timitalernissai piviusunngortillugillu. Ajoraluartumik maanna uppersivoq partiit tamaasa taamannak isumaqarsimanngitsut. Kingumummi qivialaarutta akitsuutit qineqqusaarnermi assut initusimapput eqqartorneqarsimaqalutillu. Partiit tamangajammik neriorsuutigivaat pissaaneq tigussagunikku akitsuutit qaffanneqarnikut appartinneqassasut akitsuutinillu paaaniarlutik. Una ajoraluartumik takussutissaq ataasiinnaavoq amerlasuuni naalackersuisooqatigiit piviusuunngitsunik neriorsuivallaarsimaneramik takutitsisoq. Demokraatit isumaqanngillat Naalackersuisut allannguutissatut siunnersuutaat naaperiaanermik taaneqarsinnaasoq, killormut suliaq skuffimut ilineqarluni kivisinneqaannartutut taasariaqarpoq. Inatsisartuni ilaasortatut partiimi illuatungiliuttuusumi qulakkeerneqarsinnaanngilaq Naalackersuisut aaqqissuusseqinniarnerni akitsuusersuineq allanngortinniarnerni imatut siunnerfeqassasut. Taamaattumik Demokraatit Naalackersuisut allannguutissatut siunnersuutaat soorunami akuerisinnaanngilaat unalu uteqqinneqartariaqarpoq; naaperiaanerunngilaq skuffimut kiviinnarneqarnissaanut ilisineruvoq.”*



13.11.2021

UKA2021/67  
UKA2021/68  
UKA2021/69  
UKA2021/70

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuutit aappassaaniigassanngortippai.

---

Jens Napaattooq  
Siulittaasoq

---

Erik Jensen  
Siulittaasup tullia

---

Agathe Fontain

---

Vivian Motzfeldt

---

Hans Aronsen

---

Jens-Frederik Nielsen

---

Aqqalu Jeremiassen